

TUTÚ DÍHNA NÍ CADÚHA TÉ JUÁÁ

Tnúhu sá cãháⁿ nãcuáa naníhí tãhú-ó

¹ Te yúhú té Juáá cãchí tnúhu-í xii-ndo cuendá Crístú Yáá cãháⁿ nãcuáa cundecu ndihí-o Yã Ndiõxí. Te Crístú-áⁿ sa ndècu-gá ndéé cútnàhá ní ngáva ñuyíú. Te yúhú ní xiní núu-í ndihí cue téé ní xica cuu ndihí-í nãcuáa cãa nacuáa ndùu-gá. Te ní xíndedóho-ndí tnúhu ní cãháⁿ-gá, te ní tendaha-ndí-gá te ní cutnùní ndáá iní-ndí sá ñⁿ yiqui cuñú cúu-gã. ² Te ní quixi túu-gá ñuyíú-a, te ní xiní-ndí-gá, te xíãⁿ cãchí tnúhu ndáá-ndí xii-ndo. Te cãchí tnúhu tucu-ndí sá ndécú-gã ndihí Tãtá-gã Dútú Ndiõxí ní cùu, te ní quixi-gá ñuyíú-a ní xíndecu-ndí ndihí-gá. Te ní cachí tnúhu-gá xii-ndí sá ndúú tãhú-ó cundecu ndihí-o Yá Ndiõxí ni caa ni quíhíⁿ te núu na quíndáá iní-ó-gã. ³ Te xíãⁿ dátúu-ndí núu-ndó nchàa sá ñí xiní-ndí, ndihí nchaa sá ñí xíndedóho-ndí cuendá cuu ñⁿnuu-o nchàa-o datná nchúhú cúu ñⁿnuu-ndí ndihí Tãtá-ó Dútú Ndiõxí, ndihí Déhe-gá Xítohó Jesucrístú. ⁴ Te xíãⁿ núu tèe-í nchaa tnúhu-a cuendá cudíí iní-ó nchàa-o.

Yá Ndiõxí cúu-gã datná ñⁿ ñuhú

⁵ Te nchaa tnúhu ní dánèhé ñáhá Xítohó Jesucrístú xii-ndí, xíãⁿ dánèhé ñáhà-í xii-ndo. Te ní cachí-gá sá Yã Ndiõxí cúu-gã datná ñⁿ ñuhú dáyèhé-gá iní-ó, te ducaⁿ sãtnhá-xi cùu-gá chi ío

váha quède-gá, te ñá túú quède-gá ni ìⁿ sá cuèhé sá dúhá. ⁶ Te núu cächí-ó sã ndécú-ó ìchi Yá Ndiöxí, te quède-ni-o nchaa sá cuèhé sá dúhá, te dàcuandehnde-o te ñá túú quède ndáá-ó nǔú-gã. ⁷ Te núu na càda váha-o datná quidé mèe-gá, te cuu ìⁿnuu-o nchàa-o. Te ndada ndoo ndada nine-gá iní-ó, chi cada càhnu iní-gá nchaa sá cuèhé sá dúhá quède-o, chi ðiu cuendá-áⁿ ñí xíhí Déhe-gá Xítohó Jesucrìstú núú cùrúxí.

⁸ Te núu cächí-ó sã ñà túú quède-o ni ìⁿ sá cuèhé sá dúhá, te dàndahú-ó mèe-o, te ñá túú quède ndáá-ó nǔú Yá Ndiöxí. ⁹ Te núu na nàhmá-ó nchàa yíca cuèchi-o nǔú-gã, te mee-gã cada càhnu iní-gá, te ndada ndoo-gá iní-ó, cuendá cada ndáá-ó cùndecu-o ìchi-gá, chi mee-gã ío váha quède-gá te ío ndáá quidé-gã, ducaⁿ ñí cáháⁿ-gá te ducaⁿ quède-gá. ¹⁰ Te núu na cächí-ó sã ñà túú quède-o ni ìⁿ sá cuèhé sá dúhá, te quède-o Yá Ndiöxí ìⁿ ñándéhdé, dico ñá túú ndèhnde-gá. Te ñá túú ndècu tnúhu-gá iní-ó te núu ducaⁿ na càda-o.

2

Xítohó Jesucrìstú càháⁿ ndàhú-gá cuendá-ó

¹ Te nchòhó ñáyiu cùu datná déhe-í, chido tnuní-í nchaa tnúhu-a cuendá sá vã cáda-ndó ni ìⁿ sá cuèhé sá dúhá. Dico núu ìⁿ-ndo quède-ni-ndo nándí sá cuèhé sá dúhá, te ndècu ìⁿ Yaá càháⁿ ndàhú cuendá-ó nǔú Yá Ndiöxí. Te Yaá-áⁿ cúú-gã Xítohó Jesucrìstú Yaá quidé ndáá. ² Te ní xíhí-gá sá cuendá nchaa yíca cuèchi-o cuendá ngúndecu váha-o nǔú-gã te núu na quíndáá iní-ó-gã. Te ñá díú-ní sã cuendá yíca cuèchi nchoo ñí xíhí-gá, chi

tnàhá cuendá nchaa yíca cuěchi ñáyiú ni càa xico ñuyíú.

³ Te núu cada-o nchàa nacuáa càháⁿ Yă Ndiöxí, te cutnùní iní-ó sã ndécú-ó ìchi-gá. ⁴ Te núu càchí-ó sã ndécú-ó ìchi-gá te ñá túú quide-o nacuáa càháⁿ-gá, te dàcuandehnde-o, te ñá túú quide ndáá-ó nũú-gá. ⁵ Te núu sàndáá ndisa iní-ó tnũhu-gá, te quide-o nchaa nacuáa càháⁿ-gá, te ducaⁿ te cùu iní ndisa-o-gã, te cùtnuní ndáá iní-ó sã ndécú-ó ìchi-gá. ⁶ Te núu càchí-ó sã ndécú-ó ìchi Yá Ndiöxí, te xini ñuhu-xi cada ndáá-ó cùndecu-o ñuyíú-a dàtná ní quide ndáá Xítóhó Jesucrìstú cùtnàhá ní xíndecu-gá ñuyíú-a.

Ndudú sáá

⁷ Te nchòhó ñáyiú ndècu ndìhi-í ichi Xítóhó Jesucrìstú, ñá túú chìdo tnuní-í ìⁿ tnúhu saa sà cúú-xí-ndó, chi diu-ni tnúhu sá ñi ngúndecu ndìhi-ndo nděé díchna, tnúhu ní xíndedóho-ndo nděé cùtnàhá ní sàndáá iní-ndó-gã, xíáⁿ chídó tnùn-í. ⁸ Te tnúhu-a cùu-xi datná ìⁿ tnúhu saa tè-í dándàcu iní ñáhà-í xii-ndo nàcuáa ní quide Xítóhó Jesucrìstú cùtnàhá ní quixi-gá ñuyíú-a ní quide váha-gá, te tnàhá nchòhó ní tñi-ndo tnũhu-gá te quide váha-ndo tnàhá-ndó. Te vitna ìⁿ nduu ìⁿ nduu ta cùu vai ñáyiú ta dàña nchaa sá cuèhé sá dúhá cuáháⁿ, chi Xítóhó Jesucrìstú tá dándixi túu-gá iní-yu cuendá cutnùní iní-yu nàcuáa nduu cuendá Yă Ndiöxí.

⁹ Te núu càchí-ó sã quidé vâha-o, te cùu úhú iní-ó tnàha ñáyiú-o, te xíáⁿ ñá túú quide ndáá-ó, chi ndècu-ni-o ichi cuehé ichi duha sá dúcáⁿ quide-o. ¹⁰ Te núu na cùu iní-ó tnàha ñáyiú-o dàtná cúú iní ñáhá mèe Yá Ndiöxí xii-o ña, te quide ndáá-ó

núú-gă, te vá cánúichi-o tñaha ñáyiú-o ñⁿ ichi cuehé ichi duha. ¹¹ Te núú cùu úhú iní-ó tñaha ñáyiú-o, te ñá túú quide váha-o núú Yă Ndiöxí, chi ndècu-ni-o ichi cuehé ichi duha, te ñá túú cùtnuní iní-ó sã quidé-ó. Chi cùu-o datná ñⁿ téé ndècu núú néé chi ñá cùtnuní núú-dě ndéé ichi quíhíⁿ-dé. Ducaⁿ sãtnahá-xi cùu nchoo chi ñá cùtnuní iní-ó ndéé ichi quíhíⁿ-ó te núú ducaⁿ na càda-o cuu úhú iní-ó tñaha ñáyiú-o.

¹² Te nchòhó ñáyiú cùu datná déhe-í, yúhú chídó tñuní-í tñúhu-a ñⁿ núú tütú càchí tñúhu-í xii-ndo sã ñí quide càhnu iní Yă Ndiöxí nchaa cuéchi-ndo, chi ñíu cuendá-áⁿ ñí xíhí Xítóhó Jesucristú. ¹³ Te nchòhó ñáyiú sacuéhé, yúhú téé-í tñúhu-a sá cúú-xí-ndó chi càháⁿ ndihí-ndo Jèsús, te Yaá-áⁿ sa ndècu-gá ndéé cùtnahá ní ngáva ñuyúú. Te nchòhó ñáyiú nchìcúⁿ-gá téé tucu-í tñúhu-a sá cúú-xí-ndó chi ñá túú sàndáá iní-ndó tñúhu càháⁿ yucu ñávãha.

Te nchaa nchòhó ñáyiú cùu datná déhe-í, tèe tucu-í tñúhu-a sá cúú-xí-ndó, chi sa càháⁿ ndihí-ndo Tãtá-ó Dütú Ndiöxí. ¹⁴ Te nchòhó ñáyiú ñí sãhnu, yúhú chídó tñuní-í tñúhu-a ñⁿ núú tütú chi càháⁿ ndihí-ndo Jèsús, te Yaá-áⁿ sa ndècu-gá ndéé cùtnahá ní ngáva ñuyúú. Te nchòhó ñáyiú nchìcúⁿ-gá, yúhú chídó tñuní-í tñúhu-a chi ío ñíhí ndéé-ndó ndècu-ndo, chi tñì-ndo tñúhu càháⁿ Yă Ndiöxí. Te ñá túú sàndáá iní-ndó tñúhu càháⁿ yucu ñávãha.

¹⁵ Te vá cúhúⁿ iní-ndó ñí ñⁿ sá cuèhé sá dúhá ío ñuyúú-a, te ñí vã cání iní-ndó càda-ndo. Chi núú na cùhuⁿ iní-ó nchaa sá cuèhé sá dúhá ío ñuyúú-a ña, te ñá túú Tãtá-ó Dütú Ndiöxí ñúhú iní-ó te núú ducaⁿ

na càni iní-ó. ¹⁶ Te nchaa ñáyiú ñuyíú-a quidé-yu nchaa sá cuèhé sá dúhá, chi ñu nchaa xíáⁿ cúdíí iní-yu cadá-yu. Te nchaa sá cuèhé sá dúhá sàni iní-yu, ndíhi nchaa sá xíní-yu quidé-yu. Te xíquide nínu-yu mèe-yu cuendá nchaa sá ndécú ndíhi-yu. Te nchaa sá ñà túú vǎha ní cacu nihnu-xi ñuyíú-a. ¹⁷ Te nchaa sá ñà túú vǎha lò ñuyíú-a, ndíhi nchaa sá sání cuèhé sání dùha iní-yu cuíta ndíhi nihnu-xi quíhíⁿ. Te nchaa ñáyiú tñì tñúhu càháⁿ Yǎ Ndiǒxí cundecú-yu ndíhi-gá ni caa ni quíhíⁿ.

Tnúhu ndáá tñúhu Yá Ndiǒxí ndíhi tñúhu ndehnde

¹⁸ Te nchòhó ñáyiú cùu datná déhe-í, sa ñihí-ndó tñúhu sá quíxí ìⁿ tée cunuu-gǎ-dé cuu úhú iní-dé Crístú. Te sa xíndecu-gá ñáyiú cùu úhú iní ñáhá xii-gá, núu xíáⁿ cútnùní iní-ó sǎ sà ta cuyatni nduu naa ñuyíú-a. ¹⁹ Te ñáyiú-áⁿ ñí xíndecu ndíhi ñáhá-yu xii-o, te ní queé-yu cuáháⁿ-yu chi ñà túú ní cùu ìⁿnuu-o ndíhi-yu. Chi núu dícó ní cùu ìⁿnuu-o ndíhi-yu te cundecu ndíhi ñáhá-yu xii-o ni cùu. Te duha ní cuu cuendá cutnùní ndáá iní-ó nchàa-o sá ñà túú cùu ìⁿnuu-o ndíhi-yu, chi ñà túú sàndáá iní-yu Yá Ndiǒxí.

²⁰ Te Xítóhó Jesucristú ní taxi-gá Espíritú Yǎ Ndiǒxí ndécú ndíhi-o, núu xíáⁿ tècú tñùní-ó tñúhu-gá. ²¹ Te cuendá sá xíní-ndó tñúhu ndáá tñúhu Yá Ndiǒxí núu xíáⁿ tée-í tñúhu-a, te ñà díú ìⁿ sá ñà cútnùní iní-ndó cùu-xi. Te sa ñàha-ndo sá ñi ìⁿ tñúhu ndehnde ñà túú ñùtnahá-xi núú tñúhu Yá Ndiǒxí, chi mee ñine-ni tñúhu ndáá cúu-xi.

²² Te nchaa ñáyiú càchí sá ñà díú Jèsús cúu Crístú Yáá ní tendaha Yǎ Ndiǒxí ní quixi ñuyíú-a

dàcuandehndé-yu, te cùu úhú iní-yu Jèsús. Te ñi-u-ní-yu cächí-yu sá ñà díú Dèhe Yá Ndiöxí cúú Jèsús, te sá dúcáⁿ quidé-yu te cùu úhú iní-yu Yá Ndiöxí ndihí Dèhe-gá Jèsús. ²³ Te nchaa ñáyiu ñá túú sàndáá iní sá Dèhe Yá Ndiöxí cúú Jèsús, ñáyiu-áⁿ ñà túú ndécú-yu ichi Tátá-ó Dütú Ndiöxí. Te nchaa ñáyiu càháⁿ sá Dèhe Yá Ndiöxí cúú Jèsús, ñáyiu-áⁿ ndécü-yu ichi Tátá-ó Dütú Ndiöxí.

²⁴ Te nchaa tnúhu Yá Ndiöxí ní tecú dóho-ndo ndèè díhna, tnúhu-áⁿ cuhuⁿ iní-ndó. Te núu nchaa tnúhu-áⁿ ná cùhuⁿ-ni iní-ndó, te cundecu ndihí-ndo Yá Ndiöxí ndihí Dèhe-gá cuèi vá cùndècu túu-ndo ndihí-gá ñuyíu-a. ²⁵ Te Jèsús ní cachí-gá sá ndúú tãhú-ó cùndecu ndihí-o-gá ñi caa ñi quíhíⁿ andiu.

²⁶ Te cuèndá nchaa ñáyiu dándahú ñáhá xì-ndo ní chídó tnùn-í tnúhu-a, ²⁷ dico nchòhó chi ndècu ndihí-ndo Espíritú Yá Ndiöxí sá ñi taxi Xítohó Jesucristú. Núu xíáⁿ ñá túú xìni ñuhu-ndo ñáyiu danèhé ñáhá xì-ndo, chi mee Espíritú-gá dánèhé ñáhá-xí nchàa sá vãha. Te nchaa sá dánèhé ñáhá-xí xì-ndo cuu-xi sá ndáá, te ñá díú ñiⁿ tnúhu ndehnde. Te vitna chí cãchícúⁿ nihnu-ni ichi Yá Ndiöxí datná ní sanu ichi ñaha mèe Espíritú-gá xii-ndo.

²⁸ Te nchòhó ñáyiu cùu datná déhe-í, chí cãchícúⁿ nihnu-ni ichi Xítohó Jesucristú, chi cuèndá òré ná quíxí tùcu-gá ñuyíu-a te vá yùhú-ndó te ñi vá cúú càhaⁿ núú-ndó nùú-gã. ²⁹ Te nchòhó sa nàha-ndo sá méé-gã quidé ndáá-gá, te sa xìní-ndó sã ncháá ñáyiu quide ndáá cúü-yu déhe Yá Ndiöxí.

3

Ñáyiu cùu déhe Yá Ndiöxí

¹ Te chí cuãha cuendá sá ïo cùu iní ñáhá Tãtã-ó Dũtũ Ndiõxí xii-o cuendá sá cúú-ó dẽhe-gá, chi ducaⁿ ñĩ cachí-gá, te déhe ndisa-gá cúú-ó. Te núu xíãⁿ ñáyiu ndècu ichi cuehé ichi duha ñá cúú quìní ñáhã-yu xii-o, chi ñá túú xìní-yu nàcuáa ndũu cuendá Yã Ndiõxí. ² Te nchòhó ñáyiu ío cùu iní-í, vitna cùu-o déhe Yá Ndiõxí, te vátá cùtnuní váha-gá iní-ó ñãsa cunduu-o ndèé núú cuáhãⁿ núú vëxi. Dico sa cùtnuní iní-ó sã òré ná quixi tucu Xítohó Jesucrístú te nduu-o dàtná cáá mèe-gá, chi quíní-ó-gã nàcuáa-ni càa nacuáa-ni ndũu-gá. ³ Te nchaa ñáyiu sa ndètu ñaha xii-gá sa ta ngũndecu túha-yu cuáhãⁿ, chi ta ndũu ndoo nduu nine iní-yu cuáhãⁿ dàtná cáá ndòo caa nine mee-gá.

⁴ Te nchaa ñáyiu quide nándi sá cuèhé sá dúhá ñà túú quide váha-yu núú Yã Ndiõxí, chi ní cachí-gá sá vã dúcãⁿ càda-o. ⁵ Te sa nàha-ndo sá ñĩ quixi túu Xítohó Jesucrístú ñuyíú-a cuendá cada càhnu iní-gá nchaa sá cuèhé sá dúhá quide-o, chi mee-gã ñá túú quide-gá ni ñⁿ sá cuèhé sá dúhá. ⁶ Te nchaa ñáyiu ndècu ichi Yá Ndiõxí ñá túú ñùhú-yu ichi cuèhé ichi duha. Te nchaa ñáyiu ñùhu ichi cuehé ichi duha ñá túú xìní-yu nàcuáa ndũu cuendá Xítohó Jesucrístú te ni ñã túú xìní-yu nása càa-gá. ⁷ Te nchòhó ñáyiu cùu datná déhe-í, vá dáñá-ndó mèe-ndo dandahú ñáhá ñáyiu ndècu ichi cuehé ichi duha, chi càchí-yu sá cúú cùndecu-o ichi Yá Ndiõxí te cada-o ñãndi sá cuèhé sá dúhá dico ñá ndàá. Te nchaa ñáyiu quide váha quide ndáá-yu dàtná quidé mèe Jesús. ⁸ Te nchaa ñáyiu ndècu ichi cuehé ichi duha ndècu ndihí-yu yucu ñãvãha, chi ducaⁿ quide mee-xi ndéé cùtnàhá vátá ngãva-gá ñuyíú. Te xíãⁿ ní quixi Jèsús

Déhe Yá Ndiöxí ní dáquéé tǐhú-gă nchaa sá quidé yùcu ñávãha.

⁹ Te nchaa ñáyiu ní natuha ichi Yá Ndiöxí ní nduú-yu déhe-gá, te ñá túú-gă quidé-yu nándi sá cuèhé sá dúhá chi ní ndada ndoo ní ndada nine-gá iní-yu. Núu xíáⁿ ñá túú-gă quidé-yu nándi sá cuèhé sá dúhá, chi ní ngúndecu ndíhi ñaha-gă xíi-yu. ¹⁰ Te cùtnuní iní-ó nándi cùu ñáyiu cùu déhe Yá Ndiöxí, te cùtnuní iní-ó nándi cùu ñáyiu cùu déhe yucu ñávãha. Te nchaa ñáyiu ñá túú quide ndáá, te cùu úhú iní-yu tnàha ñáyiu-yu, te ñáyiu-áⁿ ñà díú dèhe Yá Ndiöxí cúú-yu.

Cuu iní tnáhá-ó ìⁿ ìⁿ-o

¹¹ Te ndéé òré ní natuha-o ìchi Yá Ndiöxí ní tecú dóho-o sá cúú ìní-ó tnàha ñáyiu-o. ¹² Te vá cùndùu úhú iní-ó dàtná ní quide ndíi Cǎín, chi ndíi-áⁿ ní xíndecu ndíi ndíhi yucu ñávãha núu xíáⁿ ní sahani ndíi ñaní ndíi. Te ducaⁿ ní quide ndíi chi ní xíndecu ndíi ichi cuèhé ichi duha, te ñaní ndíi ní xíndecu-dé ichi váha.

¹³ Te nchòhó ñáyiu ndècu ndíhi-í ichi Xítóhó Jè-sucrìstú, vá cádá cuèndá-ndó sá cúú úhú iní ñáhá nchàa ñáyiu ndècu ichi cuehé ichi duha xii-ndo. ¹⁴ Te cunaha-ndo na càchí tnúhu-í xii-ndo sã nñu na cùu iní-ó tnàha ñáyiu-o, te cùtnuní iní-ó sã sã ní dáñá-ó ìchi sá tá dàcuíta nihnu ñaha xii-o cuáháⁿ ní cùu, te vitna ní tñi-o ìchi váha. Te nchaa ñáyiu ñá túú cùu iní tnàha ñáyiu-xi ñùhu-ní-yu ichi cuáháⁿ-yu núú úhú núú ndàhú. ¹⁵ Te nchaa ñáyiu ñá cúú quèní ndéé tnàha ñáyiu-xi cùu-yu dàtná ìⁿ ñáyiu sahani ndíyì. Te nchòhó sa nàha-ndo sá nì ìⁿ ñáyiu sahani ndíyì ñá túú ndècu ndíhi-yu tnúhu

ndee ìní sá nánìhí tàhú-yu. ¹⁶ Te Xítóhó Jesucrìstú ní xíhí-gá cuèndá nchaa yíca cuěchi-o, núu xiǎⁿ cútnùní ìní-ó sǎ ìo cùu ìní ñáhá-gǎ xii-o. Te xiǎⁿ cútnùní ìní-ó nàcuáa cada-o cùu ìní-ó tnàha ñáiyu-o, te cuěi na cùu-ó cuèndá sá cúú-xí ìⁿ-yu, cuèndá-ñǎ sá ná dàcácu nihnu-ǒ-yu núu tnündòho ndecú-yu. ¹⁷ Te núu ndècu ndìhì-o sá cóhó sǎ cáxí-ó ndìhì nchaa sá nándìhì-o, te ndècu ñáiyu ndàhú ñǎ túú vèdana ná ndécú ndìhì, te ñǎ túú chìndee-ó-yu, te ñǎ túú cùu ìní-ó Yǎ Ndiǒxí te núu ducaⁿ na càda-o. ¹⁸ Te nchòhó ñáiyu cùu datná déhe-í vá cuèndá-ni cùnàha cáhán-ndó sǎ cúú ìní tnáhá-ndó, chi cuu ìní tnáhá ndìsa-ndo te coto tnàha-ndo.

Vá yùhú-ó nùú Yǎ Ndiǒxí

¹⁹ Te núu ducaⁿ na càda-o, te cutnùní ìní-ó sǎ ndécú-ó ìchi ndáá ichi Yǎ Ndiǒxí, te ñǎ túú-gǎ ná quìhì ìní-ó nùú-gǎ. ²⁰ Te núu ndìhú ìní-ó cuèndá ìⁿ sá ñǎ quide-o, te sa nàha Yǎ Ndiǒxí te núu ní quide váha-o àdi ní quide cuèhé-ó, chi sa nàha ndáá-gá nàcuáa càa ìní-ó. ²¹ Te nchòhó ñáiyu ío cùu ìní-í, na càchí tnúhu-í xii-ndo, te núu ñǎ túú ñǎ sání ìní-ó te ñǎ túú ñǎ quidé-ó, te vá yùhú-ó nùú Yǎ Ndiǒxí. ²² Te nchaa sá vǎha na càcáⁿ-ó nùú Yǎ Ndiǒxí, te mee-gǎ taxi-gá chi tnèⁿ-o tnúhu càhán-gá, te quide-o nchaa nacuáa cùu ìní-gá. ²³ Te ní cachí Yǎ Ndiǒxí sá quìndáá ìní-ó Dèhe-gá Xítóhó Jesucrìstú, te cuu ìní-ó tnàha ñáiyu-o datná ní cachí-gá. ²⁴ Te nchaa ñáiyu tnèⁿ tnúhu-gá ndécú-yu ichi-gá, te ndècu ndìhì ñàha-gá xií-yu. Te cùtnuní ìní-ó sǎ ndécú-ó ndìhì-gá chi ní taxi-gá Espíritú-gá ndécú ndìhì-o.

4

Ñáyiú ndècu ndìhi Espíritú Yă Ndiöxí ndìhi ñáyiú cùu úhú iní ñáhá xii Xítóhó Jesucrìstú

¹ Te nchòhó ñáyiú ío cùu iní-í, vá cùtexínu quindáá iní-ndó tnùhu càháⁿ nchaa ñáyiú càchí sá ndécú ndìhi Espíritú Yă Ndiöxí. Chi díhna-gá cada cuendá váha-ndo te núu càháⁿ ndáá-yu nàcuáa càháⁿ tnúhu Yá Ndiöxí, chi ío vài ñáyiú ñuyíú-a cachí-yu sá càháⁿ-yu tnúhu-gá dico ñá ndáá. ² Te duha cutnùní iní-ó nãndi cùu ñáyiú ndècu ndìhi Espíritú Yă Ndiöxí. Nchaa ñáyiú càháⁿ ndáá sá Xítóhó Jesucrìstú ní quixi-gá ñuyíú-a te ní cuu-gá ñⁿ yiqui cùñú, ñáyiú-áⁿ cúy-yu ñáyiú cùu cuendá Yă Ndiöxí. ³ Te nchaa ñáyiú ñá túú càháⁿ nàcuáa càa Jesús cùtnàhá ní quixi-gá ñuyíú-a ñáyiú-áⁿ dándàhú ñáhã-yu, chi ñá túú cùú-yu ñáyiú cùu cuendá Yă Ndiöxí. Te ñu-ní-yu cùu úhú iní-yu Jèsús. Te nchòhó sa nàha-ndo sá cùndècu ñáyiú cuu úhú iní ñáhá xii-gá, dico yúhú càchí tnúhu-í xii-ndo sã sã ndecú-yu.

⁴ Te nchòhó ñáyiú cùu datná déhe-í, ndècu ndìhi-ndo Yá Ndiöxí, te ñá dáñá-ndó dándahú ñáhá nchàa ñáyiú càchí sá càháⁿ tnúhu-gá te ñá ndáá. Te ñá túú sàndáá iní-ndó chi Yá Ndiöxí Yaá ndécú ndìhi-ndo taxi tnuní víhí-gã dàcúxí yùcu ñávãha ndècu ndìhi nchaa ñáyiú ñùhu ichi cuehé ichi duha. ⁵ Te nchaa ñáyiú dándahú ñáhá sã càháⁿ tnúhu Yá Ndiöxí ndécú-yu ichi cuehé ichi duha, te mee-ni cuendá nchaa sá ío ñuyíú-a càháⁿ-yu. Te tédóho ñaha nchàa dava-gá ñáyiú ndècu ñu-ni ichi cuehé ichi duha. ⁶ Te nchoo cùu-o ñáyiú cùu cuendá Yă Ndiöxí. Te nchaa ñáyiú xĩndecu ichi-gá tní-yu

tnúhu càháⁿ-ó, te nchaa ñáyiú ñá túú ndècu ichi-gá ñá túú tñí-yu tnúhu càháⁿ-ó. Te duha te cùtnuní iní-ó nãndi cùu ñáyiú càháⁿ ndáá, te cùtnuní tucu iní-ó nãndi cùu ñáyiú dándahú ñáhá.

Cuu iní-ó tnàha ñáyiú-o dàtná cúú ìní ñáhá mèe Yá Ndiõxí xii-o

⁷ Te nchòhó ñáyiú ío cùu iní-í, xìni ñuhu-xi cuu iní tnáhá-ó dàtná cúú ìní ñáhá mèe Yá Ndiõxí xii-o, chi mee-gã táxí-gã sá xìní tnùní-ó cuendá cuu iní-ó tnàha ñáyiú-o. Te nchaa ñáyiú cùu iní tnàha ñáyiú-xi cùú-yu déhe Yá Ndiõxí, te cùtnuní ndáá iní-yu sá ndécú ndìhi ñaha-gá xii-yu. ⁸ Te nchaa ñáyiú ñá túú cùu iní tnàha ñáyiú-xi ñá túú ndècu ndìhí-yu Yá Ndiõxí. Te nchaa ñáyiú ndècu ndìhi Yá Ndiõxí, ñáyiú-áⁿ sãñaha-gã sá xìní tnùní-yu cuendá cuu iní-yu tnàha ñáyiú-yu. ⁹ Te cùtnuní iní-ó sã cúú ìní ñáhá Yá Ndiõxí xii-o nchàa-o, chi ní tendaha-gã ñdìi díi-ni Déhe-gá Xítóhó Jesucristú ní quixi-gá ñuyíú-a cuendá sá díú-gã cada te naníhí tàhú-ó, te núu na quindáá iní-ó tnúhu-gá. ¹⁰ Te ío cùu iní ñáhá Yá Ndiõxí xii-o nchàa-o. Te ñá díú sã méé-ó cùu iní-ó-gã, chi díhna-gá méé-gã sa cùu iní ñáhá tnáhí-gá xii-o, núu xíãⁿ ní tendaha-gã Déhe-gá ní quixi-gá ñuyíú-a ní xíhí-gá sá cuendá nchaa yíca cuèchi-o.

¹¹ Te nchòhó ñáyiú ío cùu iní-í, xìni ñuhu-xi cuu iní tnáhá-ó, chi mee Yá Ndiõxí ío cùu iní ñáhá-gã xii-o. ¹² Te ni ñⁿ nchoo ñáyiú ndècu ñuyíú-a ñá túú xìní-ó nàcuáa càa Yá Ndiõxí, dico nchoo ñáyiú ní tuha ichi-gá chi cùtnuní iní-ó sã ndécú ndìhi ñaha-gá xii-o. Núu xíãⁿ cúú ìní tnáhá-ó ñⁿ ñⁿ-o, te

cùtnuní iní-ó sǎ cúú ìní ndisa-o-gǎ. ¹³ Te cùtnuní iní-ó sǎ ndécú-ó ìchi-gá, te ndècu ndìhi ñaha-gá xii-o, chi ní taxi-gá Espíritú-gá ndécú ndìhi-o. ¹⁴ Te yúhú ndìhi dava-gá cue téé ní xica cuu ndìhi-gá càháⁿ-ndí sá ñí xiní-ndí Jèsús Déhe Yá Ndiöxí ní quixi-gá ñuyú-a, chi Tǎtá-ó Dütú Ndiöxí ní tendaha ñaha xii-gá ní quixi-gá cuendá dàcácu ni-hnu-gá nchaa nchoo ñáyiú ndècu ñuyú-a núú ùhú núú ndàhú. ¹⁵ Te nchaa ñáyiú càháⁿ ní yùhu ní iní-xi sá Déhe Yá Ndiöxí cúú Jèsús, ñáyiú-áⁿ ndécú-yu ichi-gá te ndècu ndìhi ñaha-gá xií-yu.

¹⁶ Te sàndáá iní-ó ñí yuhu ní iní-ó sǎ Yǎ Ndiöxí cúú ìní ñáhá-gǎ xii-o, chi ducaⁿ ìní-gá. Te nchaa ñáyiú cùu ìní ñáhá xii Yá Ndiöxí ndécú ndìhi ñaha-gá xií-yu. ¹⁷ Te núú ndisa cùu ìní-ó Yǎ Ndiöxí te vá yùhú-ó òré ná sǎá nduu tàudiⁿ ñaha-gá xii-o tnúú nchaa ñáyiú ndècu ichi cuehé ichi duha, chi quide ndáá-ó ndècu-o núú-gǎ ñuyú-a dàtná ní quide mee Jèsús. ¹⁸ Chi nchaa ñáyiú cùu ìní ñáhá xii Yá Ndiöxí ñá túú-gǎ yùhú-yu, te núú cùu ìní ndisá-yu-gá. Te núú yùhú-yu te xǎⁿ sa ndòhó-yu, chi ñùhú-yu ichi cuáháⁿ-yu núú ùhú núú ndàhú, chi nchaa ñáyiú yùhú ñá túú cùu ìní ndisá-yu Yá Ndiöxí.

¹⁹ Te cuu ìní-ó Yǎ Ndiöxí, chi mee-gǎ ndéé cútnàhá vátá quíndáá-gá ìní-ó tnùhu-gá sa cùu ìní ñáhá-gǎ xii-o. ²⁰ Te nchaa ñáyiú càchí sá cúú ìní-yu Yá Ndiöxí, te cùu úhú ìní-yu tnàha ñáyiú-yu, ñáyiú-áⁿ dácúandehndé-yu. Te núú ñá túú cùu ìní-yu tnàha ñáyiú-yu ndècu ñuyú-a ña, te uuⁿ-gá quídě-yu Yá Ndiöxí Yaá ñá túú xini núú-yu. ²¹ Te càchí-gá núú tnùhu-gá sá ñáyiú na cùu ìní ñáhá xii

Yá Ndiöxí, te ducaⁿ-ni cùu iní-yu tnàha ñáyíu-yu.

5

Nchaa ñáyíu ní ndacu ní dáñá ìchi cuehé ichi duha

¹ Te nchaa ñáyíu sàndáá iní sá Jèsús cúú-gă Crìstú Yaá ní quixi ñuyíú-a, ñáyíu-áⁿ cúú-yu déhe Yá Ndiöxí. Te cùu iní-yu Tătá-ó Dütú Ndiöxí, te cùu iní-yu Déhe-gá. ² Te núu cùu iní-ó Yă Ndiöxí te quide-o nacúáa càháⁿ-gá, te cùtnuní iní-ó sã cúú ìní tnáhá ndìsa-o nacúáa ndècu-o ichi-gá. ³ Te núu cùu iní-ó Yă Ndiöxí te tñi-o tnúhu càháⁿ-gá, chi cùtnuní iní-ó sã ñà díú ìⁿ sá ùhú cúú-xí dàtná càchí ñáyíu. ⁴ Te nchaa nchoo ñáyíu cùu déhe-gá sa ní dáñá-ó ìchi cuehé ichi duha, chi ní sàndáá iní-ó Jèsús nŭu xǎⁿ ní ndacu-o ñí dáñá-ó ìchi-áⁿ. ⁵ Te nchaa ñáyíu sàndáá iní sá Dèhe Yá Ndiöxí cúú Jèsús ní ndacú-yu ní quee-yu ichi cuèhé ichi duha.

Nàcuáa ní càháⁿ Yă Ndiöxí cuèndá Jèsús

⁶ Te Xítóhó Jesucristú ní quixi-gá ñuyíú-a, te ní sandute-gá. Te ñá díú-ní xǎⁿ, chi ní xíhí-gá sá cuèndá nchaa yíca cuèchi-o. Te Espiritú Yă Ndiöxí càháⁿ-xi mee-ni sã ndáá, chi càháⁿ Espiritú-gá-áⁿ sã Jèsús cúú-gă Crìstú Yaá ní quixi ñuyíú-a. ⁷ Te úní testíu ndécú àndiú, Tătá-ó Dütú Ndiöxí, ndihi Déhe-gá Xítóhó Jesucristú, ndihi Espiritú-gá. Te ìⁿ-ni tnúhu càháⁿ ndi nùní testiú-áⁿ. ⁸ Te ducaⁿ cùu-xi ñuyíú-a tucu, chi càháⁿ Espiritú Yă Ndiöxí sá Jèsús cúú-gă Crìstú. Te ní sandute-gá, te ní xíhí-gá sá cuèndá nchaa yíca cuèchi-o. Te xǎⁿ cùtnuní ndáá iní-ó sã díú Jèsús cúú-gă Crìstú. ⁹ Te núu tñi-o tnúhu váha càháⁿ ñáyíu, te váha-gá tñi-o tnúhu

càháⁿ Yă Ndiöxí, chi càháⁿ ndáá-gá sá Dêhe-gá cúú Jèsús. ¹⁰ Te nchaa ñáyiú sàndáá iní sá Jèsús cúú-gă Déhe Yá Ndiöxí, ñáyiú-áⁿ cútnùní iní-yú sá cúú-xí ìⁿ sá ndáá. Te nchaa ñáyiú ñá túú sàndáá iní tnúhu càháⁿ Yă Ndiöxí quidé-yú-gá ìⁿ ñándéhdé, dico ñá túú ndèhnde-gá, chi mèé-yú ñá túú sàndáá iní-yú sá Dêhe-gá cúú Jèsús dàtná càchí méé-gă. ¹¹ Te Yá Ndiöxí càchí tnúhu ndáá-gá sá cùndècu-o ndìhi-gá ñi caa ñi quíhíⁿ. Te duha càháⁿ-gá chi sàndáá iní-ó Dêhe-gá. ¹² Te nchaa ñáyiú na quíndáá iní ñáhá xìi Déhe-gá cundecú-yú ndìhi-gá ñi caa ñi quíhíⁿ. Te nchaa ñáyiú ñá túú sàndáá iní ñáhá xìi Déhe-gá vá cùndècú-yú ndìhí-gá.

Sáhu ndèé núú ñí ndìhi-ná

¹³ Te cuèndá sá sàndáá iní-ndó Dêhe Yá Ndiöxí núú xíáⁿ chídó tnùní-í tnúhu-a cuèndá cutnùní iní-ndó sá cùndècu ndìhi-o-gá ñi caa ñi quíhíⁿ.

¹⁴ Te ñá túú tnúhu yùhú cáháⁿ ndìhi-o Yă Ndiöxí, chi tedóho ñaha-gă xii-o núú ìⁿ-ná sá ná càcáⁿ-ó núú-gă dàtná cuìní méé-gă. ¹⁵ Te cùtnuní iní-ó sá táxí-gă sá xìcáⁿ-ó núú-gă, chi nàha-o sá tédóho ñaha-gă xii-o núú na càcáⁿ-ó nàcuáa cùu iní-gá.

¹⁶ Te núú xìní-ó ñáyiú ndècu ichi Yá Ndiöxí te quidé-yú sá ñá túú vâha núú-gă, te ndèhe-o sá ñá túú ní xíta nihnu duúⁿ-yú, te cáháⁿ ndìhi-o Yă Ndiöxí cuèndá-yú, te dàcácu nihnu ñaha-gă xíi-yú te núú na nùcúnu ichi váha-yú. Chi ió ñáyiú xìdó quidé nãndí sá ñá túú vâha te xíta nihnu duúⁿ-yú, te vá càháⁿ ndìhi-gá-ó Yă Ndiöxí cuèndá-yú. ¹⁷ Te nchaa sá cuèhé sá dúhá cùu-xi yíca cuèchi, dico ñá ncháá-xí cùu-xi sá dácuíta nihnu ñaha dùuⁿ.

¹⁸ Te nàha-o sá nchóó ñăyiu cùu déhe Yá Ndiöxí ñá túú-gă sání iní-ó càda-o nándi sá cuèhé sá dúhá. Te ducaⁿ chi mee Jèsús déhe Yá Ndiöxí xító ñàha-gá xii-o, núu xiăⁿ ñá ndácú-gă yucu ñăvãha dàxínu iní ñáhá-xí xii-o cada-o sá ñà túú vãha.

¹⁹ Te nchoo nàha-o sá ndécú ndihí-o Yá Ndiöxí. Te nchaa ñăyiu ndècu ichi cuehé ichi duha tàxi tnuní ñáhá-nă yucu ñăvãha xií-yu.

²⁰ Te nàha tucu-o sá ñùyíú-a ní quixi Jèsús Déhe Yá Ndiöxí ní taxi-gă sá xini tnùní-ó cuendá cutnùní iní-ó sã méé-gă cúú-gă Ndiöxí-ó. Te ndècu ndihí-o mee-gă ndihí Déhe-gá Jèsús, te ñndi díí-ni mee-gă cúú-gă Yá Ndiöxí, te ndècu dava-gá sá nácuàca ñaha-gá xii-o cùndecu-o ndihí-gá ni caa ni quíhíⁿ.

²¹ Te nchòhó ñăyiu cùu datná déhe-í, vá quindáá iní-ndó nchàa sá càchí-yu cùu ndiöxí, chi dícó ndaha cue téé ñuyíú-a ní cuáha nchaa xiăⁿ. Te ducaⁿ na cùnduu. Te ío chí cádá ndèe iní-nă vítna.

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 3 Mar 2023 from source files
dated 29 Jan 2022

872f7754-0986-5ecd-a059-925a708a6939